



**Uunga siunnersuut: Atuarfik pillugu Inatsisartut inatsisaata allanngortinneqarnera pillugu Inatsisartut inatsisaat nr. xx ulloq xx. xxx 2017-imeersoq (Atuartitsinerup imarisaa, aaqqissuussaaneq, piareersaaneq aamma ilisimasanik katersisarneq pillugit malittarisassanik allannguneq)**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Atuarfik pillugu Inatsisartut inatsisaanni nr. 15, 3. december 2012-imeersumi imaattunik allannguuteqartitsisoqarnissaanut ima Inuit Ataqatigiit oqaaseqarfigissavarput.

Siullermik Naalakkersuisut qutsavigissavagut susasaqartut peqatigalugit meeqqat atuarfianni allannguinnissamik misissuisimmata. Meeqqat atuarfianni allannguniaraanni pingaaruteqarluinnarpoq ilisimasallit misilittagallit meeqqallu ilikkartarnerannik ilisimasallit peqatigissallugit. Taannatoq suleriaaseq atorneqarluartarili.

Siunnersuutigisami oqaluttuarisaanerup immikkut atuartitsissutitut immikkoortinnissaa siunnersuutigineqarpoq. Oqaluttuarisaaneq, ingammik uagut nunatut, inuiattut naggueqatigiittullu ilinniartunit amigaatigineqartutut oqaatigineqartarpoq, ilaasalumi naggueqateqarnerpulluunniit naluaat. Inuiaat imminut tatigisut, siunissamut isiginiartut oqaluttuarisaanerminnik ilisimasaqartariaqarput. Oqaluttuarisaanerput meeqqat ilisimasariaqarpaat. Meeqqat ilisimasariaqarpaat Nunatsinni kina taalliortorsuarineripput, atuakkiortorsuarinerupput aammalu nunatta nunasiaasimanerata oqaluutuarsartaa ilisimasariaqarpaat. Ilisimasat tamakku nunamik ilisimaarinninnermik, tulluusimaarutiginninnermik siuarsarusunnermillu pilersitseqqataaffigissavaat. Taamaamat Inuit Ataqatigiit iluarivaat oqaluttuarisaanerup immikkut atuartitsissutigineqartarnissaa.

Allanngortinniakkat ilagivaat ilinniartitsissutissat sumiiffinni ataasiakkaani toqqagassat aaqqissuunneqarneri. Aaqqissuussinermi nipilersornermut sammisat ilikkagassallu annertusarniarneqarnerat iluarinarpoq. Meeqqat, inuit assigiinngitsutigut pisinnsaqartarpugut.

# INUIT ATAQATIGIIT

## Inatsisartuni



Ilagut nipilersornikkut pikkoriffeqartarput, ilagut assassornikkut pikkoriffeqartarlutik. Meeqqalli atuarfianni atuagarsornikkut pikkoriffiit kisimik aallunneqarput. Mersortarfiit, sanasarfiit ilusilersuisarfiillu atorunnaarlutik qaqutigut atorneqartalerput. Nunatta pisariaqartippai inuit isumassarsiaminnik ineriartortitsisinnaasut, tuniniaasinnaasut, pilersitsisinnaasut. Taakkulu meeqqat atuarfianni inerisartariaqarpavut. Taamaammat naalackersuisunut misissoqqarput sumiiffinni ataasiakkaani toqqagassat mersornermik, sananermik ilusilersuinermillu atuartitsivittut ingerlanneqarsinnaaneri misissoqqullugit.

Allannguutissat ilaat ukiumik atuarfiusumik uteqqiisinnaaneq alluisinnaanerlu periarfissatut pitsaasutut isigaagut. Uteqqiisinnaanerli nalinginnaasunngussanngitsoq qulakkeerniartariaqarpoq. Ilinniartitsisumut meeraq ilikkartikkuminaappallaarpat ilikkartitsinissamut periarfissat allat tamackersimaneqartariaqarput, aammalu angajoqqaat ilikkarnissamut ikiuulluarnissaat qulakkeerneqaqqaartariaqarluni. Uteqqiisinnaaneq allatut ajornarluinnartoqaraangat aatsaat pisariaqarpoq, soorlu 10kl-mi napparsimaqattaarpaallarsimagaanni atuarunnaaginnarani 10.klassimik uteqqisinnaasariaqarpoq. Nalinginnaasunngunnginnisssaanulli naalackersuisut qulakkeerinnittariaqarput.

Meeqqat angerlarsimaffiutigalugu atuarfiini (skolehjem) annikinnerpaaffiliinissaq isumaqatigaarput. Tassanili aamma meeqqat amerlassusaannut naapertuuttunik inersimasunik isumassuisinnaasunik atorfeqartitsisarnissaq Naalackersuisunut misissoqarput. eeqqat angajoqqaatik qimallugit atuartut toqqissisimanartumik, inersimasunit isumagineqarluarlutik isumassorneqarlurlutillu angerlarsimaffeqarnissaat pingaartipparput.

Taama oqaaseqarluta siunnersuut ataatsimitsitaliamut susassaqartumut ingerlateqqikkumavarput.